

Liklik nius long

*prea,*

*givim na go*

**EBC Wok Misin**

NIUSLETA NO. 68 DISEMBA 2018

## DIA OL PREN BILONG WOK MISIN!

Mipela i amamas long salim dispela niusleta No. 68 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 30 Disemba, 2018. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

### Adres bilong salim mani:

EBC Overseas Mission  
BSP Goroka Branch  
No. 1000 751 861

### Ol Fild Adres:

**Mike Kaire**  
EBC Community Service  
P.O. Box 250, Dili, East Timor  
Mobile: (00) 670 77757402  
Email: mikekaire@gmail.com

### Sifu Family

STT BMW Papua  
Nabire 98802  
HP: 0852-1357-0016/  
0812-48620-831  
Phone: (+628) 124 8620831  
Email: sifuutina1@gmail.com

### Missions Mobiliser

Muko Aveo  
missions.mobiliser.ebc@gmail.com  
Mobile: 72681881

### Liklik nius long EBC Wok Misin

Design & Printing by:  
EBC Publications Department, Lae

Ol dia bratasusa long nem bilong Jisas, King bilong yumi olgeta.

Mipela i amamas tru long bringim long yupela sampela nius long wok misin insait long inlan bilong PNG na long ovasis misin fil bilong yumi.

Mipela i laik tenkyu tru long prea na sapot bilong yupela. Yumi prea o givim o go na autim nem bilong Jisas, i olsem, yumi olgeta wok bung wantaim long kirapim kingdom bilong God. Wok i pinis na Jisas bai kam.

Long Nehemia 3.1-3 i gat stori long ol man i wokim gen banis bilong taun Jerusalem.

### Nehemia 3.1 i tok, "Olgeta man i stat long mekim wok."

Olgeta man i helpim na i no gat wanpela em i stap o raun nating long dispela taim we Nehemia i kirapim dispela wok. Insait long ol dispela ves i gat 5-pela poin:

1) Tim wok i kamap wantaim wanpela gutpela tim lida, em Nehemia. 2) Ol i skelim wok. 3) Ol lida, hetpris, Livai na pris i putim han. 4) Olgeta i gat wanpela sutmak. 5) Ol i pinisim wok wantaim.

Yumi tingim tok Jisas i mekim long Matyu 24.14. "Na bai ol i autim dispela gutnius bilong kingdom bilong God long olgeta hap bilong graun, bai olgeta lain manmeri i ken harim, na bihain tasol bai las de i kamap." Yumi olgeta i wok bung wantaim bai gutnius i go long olgeta hap graun na olgeta manmeri bai i harim na Jisas bai i kam.

### NABIRE

**N**Famili Sifu – Wanpela bikpela hevi tru i painim famili Sifu na ol i no sindaun gut long ples. Bihain long dai bilong late Pasto David Sekipa long Kainantu, wanpela pait i kirap na ol i bin kukim wanpela haus kapa bilong famili Sifu wantaim olgeta samting insait long haus.

Famili i bin ranawe i go i stap long ples bilong susa Baba, meri bilong Sifu. Tasol no longpela taim na wanpela pait i kirap insait long famili na ol i kilim 4-pela lain bilong susa Baba, wanpela em i brata bilong em. Ol misinari famili i nogat hap long go. Nau ol i kam stap long Orobiga misin stesin long Goroka.

Long dispela taim, ol i wetim visa bilong ol long Indonesia. Gidi, em Sios bilong Papua i Evanselikel save helpim ol sios long wokim visa bilong husat i laik i go wok misin long Wes Papua insait long Indonesia. Ol i isi isi tru long wokim dispela visa na yumi laik go on long prea inap rot bilong kisim visa i ken op na bai ol famili i go bek long Wes Papua.



Famili Sifu

Em i no isi long kisim visa. Nau ol i wet wan yia pinis. Tasol insait long dispela wet, God i no larim ol i stap wantaim hevi na wari, nogat.

Famili Sifu i wetim wanpela bebi bai i kamap. Klostu longpela taim na ol i no bin ting bai wanpela pikinini bai i kamap bihain long Binosi. Em i wanpela bikpela blesing long famili Sifu. Insait long sampela kain hatpela paia ol i stap long en, ol i amamas long wanpela bebi bai i kamap. Yumi laik tenkyu na prea inap God i ken helpim na bai dispela bebi i ken bon gut.

## IS TIMOR

Tenkyu tru long olgeta prea na sapot bilong yupela ol dia bratasusa, pikinini na ol papamama. Taim gutpela samting i kamap, nogut tu i save kamap tasol God i save win oltaim.

Pasto Miquel husat i bin kisim trening long Mike na i bin wok wantaim Mike nau i go joinim wanpela misinari bilong Saut Korea na dispela i wok long bringim salens long sios bilong yumi long ples Borai. Yumi ken prea long Pasto Miquel inap God i ken sori long em na helpim em long bihainim laik bilong Bikpela.

God i helpim na planti manmeri i wok long kam lotu long Borai. Yumi ken prea long ol kongrigesen na ol pikinini long Borai inap God i ken strongim bilip bilong ol.



Pikinini long Borai

Mike na Mangen bai i kisim holide wik na bai tupela i kam long PNG. Bihain long holide bai tupela i go bek long Is Timor. Taim bilong tupela long Is Timor isi isi bai i kam arere. Nau yet i nogat wanpela i redi long i go long Is Timor na kisim ples bilong tupela. Bikpela wok namel long nupela Baibel Skul long ples Loes na sios long Borai i nidim wanpela nupela

misinari i ken stap redi long kisim ples bilong Mike na Mangen taim tupela i kam bek.

Yumi ken prea planti inap God i ken



Mike na Mangen Kaire

kirapim wanpela famili i ken i go long Is Timor bipo long Mike na Mangen i kam bek.

## TENKYU POIN

- ☞ Tenkyu long God i kirapim ol bratasusa long autim nem bilong Jisas long olgeta hap.
- ☞ Tenkyu long God i strongim famili Sifu long taim bilong hevi na bebi tu em i givim.
- ☞ Tenkyu God i blesim wok long Is Timor.

## ASKIM POIN

- ☞ Prea long visa bilong Sifu na famili.
- ☞ Prea long God i ken kirapim wanpela famili husat i redi tru i ken go long Is Timor.
- ☞ Prea long Care Channels International (CCI) inap God i ken lukautim ol na blesim wok misin bilong ol insait long planti kantri long Asia na long Is Timor tu.
- ☞ Prea long olgeta wok manmeri bilong wok OM, God i ken strongim ol.
- ☞ Prea long olgeta nupela manmeri i kam tanim bel long Tari, Green River na ol arapela inlan misin fil, God i ken strongim ol.

## JOSEPH GARIMA FAMILI

Hetkomiti i tok orait long famili Garima bai i kisim trening yet. Sapos God i opim rot long CLTC bai Brata Joseph i wokim distens stadi long CLTC Branch long Lae na stap long 6-Mile stesin bilong yumi.

## OPERESEN MOBILASESEN (OM)

Dispela ogenaisesen i wok long moa long 100 kantri long wol. OM i gat tupela bikpela hap we em i save mekim wok misin em long sip na long graun. Sip Logos Hope i stap nau long Saut Amerika. Nau longpela taim liklik na sios bilong yumi i no salim ol manmeri long wok misin long narapela kantri long OM. Yumi ken prea inap God i ken kirapim sampela long go.



Logos Hope i stap long El Salvador

## INLAN MISIN

God i blesim tru haus lotu opening long Tari na bikpela namba bilong ol Tari manmeri i tanim bel. Yumi tenkyu long God i wok long bel bilong ol Tari manmeri. Yumi i ken go on long prea moa yet bai gutnius i ken i go long olgeta hap bilong Hella provins.

Plis tingim olgeta inlan wok misin bilong yumi long Manus, Samarai, Buka, Green River, Tari, Wabo na planti hap kona insait long PNG.

Tenkyu tru long yupela olgeta bratasusa long sanap wantaim mipela long mekim na tingim wok misin long inlan na long ovasis.

God i ken blesim yupela olgeta. Inap long 2019, God willing, mipela bai bringim moa nius bilong wok misin.